

四庫全書

集部

欽定四庫全書

石倉歷代詩選卷三十四

明 曹學佺 編

盛唐三

儲光羲

兗州人

野田黃雀行

嘖嘖野田雀不知軀體微閒穿深叢裏爭食復爭飛窮
老一積舍棗多桑樹稀無棗猶可食無桑何以衣蕭條

空倉暮相引時來歸斜路豈不捷渚田豈不肥水長路
且壞惻惻與心違

樵父詞

山北饒朽木山南多枯枝枯枝作采薪爨室私自知
朝礪斧尋視暮行歌歸先雪隱薜荔迎暄卧茅茨清澗
日濯足喬林時曝衣終年登險阻不復憂安危蕩漾與
神遊莫知是與非

漁父詞

澤魚好鳴水溪魚好上流漁梁不得意下渚潛垂鉤亂
荇時礙楫新蘆復隱舟靜言念終始安坐看沈浮素髮
隨風揚遠心與雲遊逆浪還極浦信潮下滄洲非為徇
行役所樂在行休

射雉詞

曝暄理新翳迎春射鳴雉原田遙一色臯陸曠千里遙
聞咿喔聲時見雙飛起羃歷踈蒿下毳毼深麥裏顧敵
乃忘生爭雄方決死仁心貴勇義豈復能傷此超遙下

故墟迢遞回高峙大夫昔何苦取笑歡妻子

昇天行貽盧六健

真人居閭風時奏清商音聽者即王母泠泠和瑟琴坐
對三花枝行隨五雲陰天長崑崙小日久蓬萊深上由
玉華宮下視首陽岑神州亦清淨要自有浮沈惻惻苦
哉行哢哢遊子吟廬山逢若士思欲化黃金雨雪沒太
山誰能無歸心逍遙在雲漢可以來相尋

效古二首

晨登涼風臺暮走邯鄲道曜靈何赫烈四野無青草火
軍北集燕天子西居鎬婦人役州縣丁男事征討老幼
相別離哭泣無昏早稼穡既殄絕川澤復枯槁曠哉遠
此憂冥冥商山皓

東風吹大河河水如倒流河洲塵沙起有若黃雲浮
霞燒廣澤洪曜赫高丘野老泣相語無地可蔭休翰林
有客卿獨負蒼生憂中夜起躑躅思欲獻厥謀君門峻
且深踈足空夷猶

雜詩二首

混沌本無象末路多是非達士志寥廓所在能忘機耕
鑿時未至還山聊采薇虎豹對我蹲鶯鶯傍我飛仙人
空中來謂我勿復歸格澤為君駕雲霓為君衣西遊崑
崙墟可與世人違

秋氣肅天地太行高崔嵬猿狖清夜吟其聲一何哀寂
寥掩圭華夢寐遊蓬萊琪樹遠亭亭玉堂雲中開洪崖
吹簫管玉女飄飄來雨師既先後道路無纖埃鄙哉楚

襄王獨如雲陽臺

述華清宮五首

上在蓬萊宮莫若居華清朝朝禮玄閣日日聞體輕大
聖不私已精禋為羣氓

上出蓬萊時六龍儼齊首長道舒羽儀彤雲映前後天
聲殷宇宙真氣到林藪

昔在軒轅朝五城十二樓今我神泉宮獨在驪山阪羣
芳趨順動百辟隨天遊

金史卷八十二
卷三十四
正月開陽和通門緝元化穆穆睟容歸豈為明燈夜高
山大風起肅肅隨龍駕

上林神君宮此地即明庭山開鴻濛色天轉招搖星三
雪報大有孰謂非我靈

石子松

盤石青巖下松生盤石中冬春無異色朝暮有清風五
臘何人采西山舊兩童

駕簷藤

得從軒墀下如勝松栢林生枝逐架遠吐葉向門深何
許答君子簷間朝暝陰

池邊鶴

舞鶴傍池邊水清毛羽鮮立如依岼雪飛似向池泉江
海雖言曠無如君子前

釣魚灣

垂釣綠灣春春深杏花亂潭清疑水淺荷動如魚散日
暮待情人維舟綠楊岼

幽人居

幽人下山徑云去夾青林滑處莓苔濕暗中蘿薜深春
朝煙雨散猶帶浮雲陰

題太玄觀

門外車馬喧門裏宮殿清行即翳若木坐即吹玉笙所
喧既非我真道其冥冥

至嵩陽觀即天皇故宮

真人上清室乃在中峰前花霧生玉井霓裳畫列仙念

茲宮故宇多此地新泉松栢有清陰薜蘿亦自妍一聞
步虛子又話逍遙篇忽若在雲漢風中意泠然

貽韋鍊師

精思莫知日意靜如空虛三鳥自來去九光遙卷舒新
池近天井玉宇停雲車余亦苦山路洗心祈道書

喫茗粥作

當晝暑氣盛鳥雀靜不飛念君高梧陰復鮮山中衣數
片遠雲度曾不蔽炎暉淹留膳茶粥共我飯蕨薇敝廬

既不遠日暮徐徐歸

泛茅山東谿

清晨登仙峰峰遠行未極江海霽初景草木含新色而
我任天和此時聊動息望鄉白雲裏發棹清谿側松栢
生深山無心自貞直

遊茅山五首

十年別鄉縣西去入皇州此意在觀國不言空遠遊九
衢平若水利往無輕舟北洛反初路東江還故丘春山

多秀木碧澗盡清流不見子桑扈當從方外求

世業傳儒行行成非不榮其如懷獨善況以聞長生家
近華陽洞早年深此情巾車雲路入理棹瑤谿行天地
朝光滿江山春色明王廷有軒冕此日方知輕

平生非作者望古懷清芬心以道為際行將時不羣茲
山在人境靈貺久傳聞遠勢一峰出近形千嶂分冬春
有茂草朝暮多鮮雲此去亦何極但言西日曛

昔賢居柱下今我去人間良以直心曠兼之外視閒垂

綸非釣國好學異希顏落日登高嶼悠然望遠山谿流
碧水去雲帶清陰還想見中林士巖扉長不關

名嶽徵仙事清都訪道書山門入松栢天路涵空虛南
極見朝采西潭聞夜漁遠心尚雲宿浪跡出林居為已
存實際忘形同化初此行良已矣不樂復何如

述降聖觀

一山盡天苑一峰開道宮道花飛羽衛天鳥遊雲空玉
殿俯玄水春旗搖素風夾門小松栢覆井新梧桐自昔

太仙下乃知元化功神皇作桂館此意與天通

題眇上人禪居

真王清淨子燕居復行心結宇隣居邑寤言非遠尋丹
青丈室滿草樹一庭深秀色玄冬發交枝白日陰江流
映朱戶山鳥鳴香林獨住已寂寂安知浮與沈

過新豐道中

二十八年
有詔種果

西下長樂坂東入新豐道雨多車馬稀道上生秋草太
陰蔽臯陸莫知晚與早雷雨杳冥冥川谷漫浩浩詔書

植嘉木衆言桃李好自愧無此容歸從漢陰老

夜到洛口入黃河

河洲多青草朝暮增客愁客愁惜朝暮枉渚暫停舟中
宵大川靜解纜逐歸流浦淑既清曠沿洄非阻修登臚
望落月擊楫悲新秋倘遇乘槎客永言星漢遊

使過彈箏峽作

烏雀知天雪羣飛復羣鳴原田無遺粟日暮滿空城達
士憂世務鄙夫念王程晨過彈箏峽馬足凌兢行雙壁

隱靈曜莫能知晦明皚皚堅冰白漫漫陰雲平始信古人言苦節不可貞

泊舟貽潘少府

時潘在後浦

行子苦風潮維舟未能發宵分卷前幔卧視清秋月四澤葭葦深中洲燼火絕蒼蒼水霧起落落疎星沒所遇盡漁商與言多楚越其如念極浦又以思明哲常若干里餘況之異鄉別

仲夏入園中東陂

方塘深且廣伊昔俯吾廬環岼垂綠柳盈潭發紅蕖上
延北原秀下屬幽人居暑雨若混沌清明如空虛此鄉
多隱逸水陸見樵漁廢賞亦何貴為歡良易攄且言重
觀國當此賦歸歟

山居貽裴十二迪

落葉滿山砌蒼煙埋竹扉遠懷青冥士書劍常相依霜
卧眇茲地琴言紛已違衡陽今萬里南雁將何歸出徑
惜松引入舟憐釣磯西林有明月夜久空微微

秦中歲晏馬舍人宅宴集

冬暮久無樂西行至長安故人處東第清夜多新歡廣
庭竹陰靜華池月色寒知音盡詞客方見交情難

薦玄德公廟

神道本無已成化亦自然君居寥天上德在玉華泉真
遊踐王豫永日遲雲仙表微在營道明祀將祈年靈山
俯新邑松上生彩煙豈知穆天子遠去瑤池邊

至嶽寺即大通大照禪塔上溫上人

秋山下映宮宮色宜朝陽迢遞在半嶺參差非一行燕
息雲滿門出遊花隱房二尊此成道禪宇遙相望鳳鐸
天中鳴巖梯松下長山墟響信鼓蘅薄生蕙香起滅一
以雪往來亦誠亡悲哉門弟子要自知心長

終南幽居獻蘇侍郎三首

時拜太
祝未上

暮春天氣和登嶺望層城朝日懸清景巍峩宮殿明聖
君常臨朝達士復懸衡道近無良足歸來卧山楹靈堦
曝仙書深室鍊金英春巖松柏秀晨路鷗鷄鳴羽化既

有言無然悲不成

中歲尚微道始知將谷神抗策還南山水木自相親深
林開一徑青嶂成四鄰平明去采薇日入行刈薪雲歸
萬壑暗雪罷千巖春始看玄鳥來已見瑤華新寄言塞
芳者無乃後時人

卜築青巖裏雲蘿四垂陰虛空若無人喬木自成林時
有清風至側聞樵采音鳳皇鳴南岡望望隔層岑既言
山路遠復道谿流深倏倏空中遊虬龍水間吟何當見

輕翼為我達遠心

題應聖觀

空中望小山山下見餘雪皎皎河漢女在茲養真骨登
門駭天書啓籙問仙訣池光搖水霧燈色連松月合塲
起花臺折草成玉節天雞弄白羽王母垂玄髮北有上
年宮一路在雲霓上心方嚮道時復朝金闕

至閒居精舍呈正上人

即天仰
故宮

太室三招提其趣皆不同不同非一趣况是天遊宮雙

嶺前夾門閣道復橫空寶坊若花積宛轉不可窮流泉
自成池青松信饒風秋晏景氣迴晶明丹素功近將隱
者鄰遠與西山通大師假慧照念以息微躬

酬綦母校書夢邪溪見贈之作

校文在仙掖每有滄洲心況以北窓下夢遊清溪陰春
看湖水漫夜入迴塘深往往纔垂葛出舟望前林山人
松下飯釣客蘆中吟小陰何足貴長年固可尋還車首
東道惠言若黃金以我采薇意傳之天姥岑

同王十三維偶然作

仲夏日中時草木看欲焦田家惜功力把鋤來東臯顧
望浮雲陰徃徃誤傷苗歸來悲困極兄嫂共相饒無錢
可沽酒何以解劬勞夜深星漢明庭宇虛寥寥高柳三
五株可以獨逍遙

北山種松柏南山種蒺藜出入雖同趣所尚各有宜孔
子貴仁義老氏好無為我心若虛空此道將安施暫過伊
闕間晚晚三伏時高閣入雲中芙蓉滿清池要自非我

室還望南山隱

野老本貧賤冒雨鋤瓜田一畦未及終樹下高枕眠荷
篠者誰子皤皤來息肩不復問鄉墟相見但依然腹中
無一物高話羲皇年落日臨層隅逍遙望晴川使婦提
蠶筐呼兒榜魚船悠悠泛綠水去摘浦中蓮蓮花豔且
美使我不能還

浮雲在虛空隨風復卷舒我心方處順動作何憂虞但
言嬰世網不復得閒居迢遞別東國超遙來西都見人

乃恭敬曾不問賢愚雖若不能言中心亦難誣故鄉滿
親戚道遠情日疎偶欲陳此意復無南飛鳧

田家雜興

春至倉庚鳴薄言向田墅不能自力作黽勉娶隣女既
念生子孫方思廣園圃閒時相顧笑喜悅好禾黍夜夜
登嘯臺南望洞庭渚百草被霜露秋山響砧杵却羨故
年時中情無所取

衆人耻貧賤相與尚膏腴我情既浩蕩所樂在畋漁山

澤時晦暝歸家暫閒居滿園植葵藿繞屋樹桑榆禽雀
知我閒翔集依我廬所願在優游州縣莫相呼日與南
山老兀然傾一壺

逍遙阡陌上遠近無相識落日照秋山千巖同一色網
罟繞深莽鷹鷂始輕翼獵馬既如風奔獸莫敢息駐旗
滄海畔犒士吳宮側楚國有夫人性情本貞直鮮禽徒
自致終歲竟不食

貧士養情性不復知憂樂去家行賣畚留滯南陽郭秋

至黍苗黃無人可刈獲孺子朝來飯把竿逐鳥雀忽見
梁將軍乘車出宛洛意氣軼道路光輝滿墟落安知負
薪者啞啞笑輕薄

楚山有高士梁國有遺老築室既相鄰向田復同道糗
糒常共飯兒孫每更抱忘此耕耨勞愧彼風雨好螭蛄
鳴空澤鷗鵲傷秋草日夕寒風來衣裳苦不早

題辨覺精舍

朝隨秋雲陰乃至青松林花閣空中遠方池巖下深竹

風亂天語谿響成龍吟試問真君子遊山非世心

題崔山人別業

南陽隱居者築室丹谿源谿冷懼秋晏室寒欣景暎山
雞鳴茵閣水霧入衡門東嶺或舒嘯北窓時討論封君
渭川竹逸士漢陰園何必崆峒上獨為堯所尊

行次田家澳梁作

田家俯長道邀我避炎氛當暑日方晝高天無片雲桑
間禾黍氣柳下牛羊羣野雀栖空屋晨風不復聞前登

澳梁坂極望甘泉分逆旅方三舍西山猶未曛

昭聖觀

主家隱谿口微路入花源數日朝青閣彩雲猶在門雙
樓夾一殿玉女侍玄元扶檄盡蟠木步闔多畫幙新松
引天籟小柏繞山樊坐弄竹陰遠行隨谿水喧石池辨
春色林獸知人言未逐鳳凰去真宮在此原

題辛道士房

全神不言命所尚道家流迨此遠南楚遂令思北遊先

生秀衡嶽王立居玄丘門帶江山靜房隨瑤草幽逍遙
三花發罔象五雲浮自有太清紀曾垂草髮憂大年方
橐籥小智即蜉蝣七日赤龍至莫令余獨留

晦日任橋池亭

溫泉作天邑直北開新洲未有菰蒲生即聞鳬雁遊六
亭在高岬數畝居中流晦日望清波相與期泛遊西道
苦轉穀北堤疲行舟清泠水木陰繞可適我憂

河中望鳥灘作貽呂四郎中

河流有深曲舟子莫能知弭棹臨沙嶼微吟西日馳
平明春色霽兩岼好風吹去去川途盡悠悠親友離漢宮
成羽翼伊水弄參差為惜淮南子如何攀桂枝

秦中初霽獻給事二首

渭水收暮雨處處多新澤宮苑傍山明雲林帶天碧
君子聳高駕英聲邈今昔鰈珮出中臺影纓入仙掖
夙心韋清鑒晚志欣良覲鳴盜非足徵願言同下客

南國久為思西都當作賓雲開天地色日照山河春
善

聽在知己揚光惟達人妙年弄柔翰弱冠偶良辰擢第
文昌閣還家滄海濱寸心何所望東掖有賢臣

秋次灞亭寄申大

橘柚植寒陵芙蓉蒂修坂無言不得意得意何由展況
我行且徒而君往猶蹇既傷人事近復言天道遠薄暮
入空亭中夜不能飯南聽鴻雁盡西見招搖轉千門漢
主宮百里周王苑果杲初景出油油鮮雲卷會朝幸歲
真校獵從秋獮念君久京國雙涕如露泣無人薦子雲

金史卷三十四
太息竟誰辨

鞏城東莊道中作

北陵散寒鳥西山照初日
婉孌晉陽京踟躕野人室
南軒草間去後乘林中
出靄靄長路暖遲遲狹路歸
蜉蝣時蔽月枳棘復傷衣
城上東風起河邊早雁飛
夏王紀冬令殷人乃正月
涯口度新雲山陰留故雪
韋逢耆耄諾餘待親隣
別總轡出叢薄歇鞍登峻隅
春源既蕩潏伏戰亦睢盱
未獲遵平道徒言信薄夫

赴馮翊作

本自江海人且無家廓志大明耀天宇靄靄風雨被迢
遞別荆吳飄飄涉沂泗廣川俟舟楫峻坂傷騏驎蹭蹬
失歸道崎嶇從下位西出太華陰北走少梁地葱蘢墟
落色泱泱關河氣耻從俠烈遊甘為刀筆吏寶劍茱萸
匣豈忘知音貴大道且泛然沈浮未云異

晚霽中園喜赦作

五月黃梅時陰氣蔽遠邇煙雲連晦朔菰菜生隣里落

日燒霞明農夫知雨止幾悲衽席濕長歎垣牆毀曠朗
天宇開家族躍以喜渙汗發大號坤元更資始散衣出
中園小徑尚滑屨池光搖萬象倏忽滅復起嘉樹如我
欣欣豈云已

發商丘

河水日夜流客心多殷憂維梢歷宋國結纜登商丘漢
皇封子弟周室命諸侯搖搖世祀怨傷古復兼秋鳴鴻
念極浦征旅慕前儔太息梁王苑時非牧馬遊

田家即事答崔二東臯作四首

玄鳥雙雙飛杏林
初發花吟媿命僮僕
可以樹桑麻
清旦理犁鋤
日入未還家

有客山中至
言傳故人訊
蕩漾敷遠情
飄飄吐清韻
猗歟春臯上
無乃成秋興

念別求須臾
忽至嚶鳴時
菜田燒故草
初樹養新枝
所寓非幽深
夢寐相追隨

依依親隴畝
寂寂無隣里
不聞雞犬音
日見和風起
賴

君遺拔藻憂來散能弭

同諸公秋霽曲江俯見南山

天靜終南高俯映江水明有若蓬萊下淺深見澄瀛羣
峰懸中流石壁如瑤瓊魚龍隱蒼翠鳥獸遊清泠孤蒲
林下秋薜荔波中輕山萋浴蘭沚水若居雲屏嵐氣浮
渚宮孤光隨曜靈陰陰豫章館宛宛百花亭大君及羣
臣宴樂方嚶鳴吾黨二三子蕭晨怡性情逍遙滄洲時
乃在長安城

山中貽崔六琪華

恍惚登高嶺徘徊看落日遙想仲長園如親
幼安室春渚菖蒲登山中撥穀鳴相思不道遠
太息未知情意君來此地時復疎林薄中夜掃
衡門迎晨閉菌閣屣履清池上家僮奉信歸
憂隨落花散目送歸雲飛故交在天末新知復
千里無人暫往還獨作中林士

京口題崇上人山亭

清旦歷香巖巖徑紆復直花林開宿霧遊目清
霄極分

明窗戶中遠近山川色金沙童子戲香飯諸天食呌呌
海鴻聲軒軒江燕翼寄言清淨者閭閻徒自踣

朝邑蔡主簿期不會二首

下位日趨走久之賓會疎空遲偶詞賦所媿比園廬朝
念池上酌暮逢林下書方將固封守暫欲混畋漁衰柳
隱長路秋雲滿太虛遙遙望左右日入未迴車

日入清風至知君在西偏車輿既成列賓僕復能賢迢
遞下墟坂逍遙看井田蒼山起暮雨極浦浮長煙服義

大如志交歡數盡年寧言十餘里不見空來還

鞏城南河作寄徐三景暉

初年雨候遲鞏洛河流小搖搖芳草岸屢見春山曉清
露洗雲林輕波戲魚鳥惟言故人遠不念鄉川眇舟楫
去縈迴湍淑行奔峭寄書千里路莫道南鴻少

貽閻處士防卜居終南

春風搖雜樹言別還江汜堅冰生綠潭又客三十里
北夢惟顏色懸情乃文史滌耳貴清言披歡遲玉趾秦城

疑舊廬佇立問焉如穉子跪而說還山將隱居竹林既
深遠松宇復清虛跡迴事多逸心安趣有餘石門動高
韻草堂新著書騫飛久超絕蹇足空躊躇猶有昔時意
望君當照車驅車當六國何以湏潛默聖主常徵賢羣
相每舉德此時方獨往身志將何欲願謝山中人迴車
首歸躅

華陰作貽祖三詠

朝行敷水上暮出華山東高館宿初靜長亭秋轉空日

餘久淪汨重此聞霜風析歷入谿樹颼颼驚夕鴻悽然
望伊洛如見息陽宮舊識無高位新知盡固窮夫君獨
輕舉遠近善文雄豈令千里駕崎嶇秦塞中

閒居

薄遊何所愧所愧在閒居親故不來往中園時讀書步
櫚滴餘雪春塘抽新蒲梧桐漸覆井時鳥自相呼悠然
念故鄉乃在天一隅安得如浮雲來往方須臾

新豐主人

新豐主人新酒熟舊客還歸舊堂宿滿酌香含北砌花
盈樽色泛南軒竹雲散天高秋月明東家少女解秦箏
醉來忘却巴陵道夢中疑是洛陽城

同張侍御宴北樓

今之太守古諸侯出入雙旌垂七旒朝覽干戈時聽訟
暮延賓客復登樓西山漠漠崦嵫色北渚沈沈江漢流
良宵清淨方高會繡服光輝連阜蓋魚龍恍惚階除下
雲霧杳冥窓戶外水靈慷慨行泣珠遊女飄飄思解珮

蒼蒼低月半遙城
落落疎星滿太清
不分開襟悲楚奏
願言吹笛退胡兵
軒后清丘埋猋猱
周王白羽掃撓搶
期君武節朝龍闕
余亦翺翔歸玉京

薔薇篇

裊裊長數尋
青青不作林
一莖獨秀當庭心
數枝分作滿庭陰
春日遲遲欲將半
庭影離離正堪玩
枝上嬌鶯不畏人
葉底飛蛾自相亂
秦家女兒愛芳菲
畫眉相伴采葳蕤
高處紅鬚欲就手
低邊綠刺已牽衣
蒲萄架上

朝光滿楊柳園中暝鳥飛連袂踏歌從此去風吹香氣
逐人歸

登戲馬臺作

君不見宋公仗鉞誅燕後英雄踴躍爭趨走小會衣冠
呂梁壑大徵甲卒礪礪口天開神武樹元勲九日茱萸
餐六軍泛泛樓船遊極浦搖搖歌吹動浮雲居人滿目
市朝變霸業猶存齊楚甸泗水南浮桐柏川沂山北走
瑯琊縣滄海沈沈晨霧開彭城烈烈秋風來少年自言

未得意日暮蕭條登古臺

臨江亭

晉家南作帝京鎮北為關江水中分地城樓下帶山金陵事已往青蓋理無還落日空亭上愁看龍尾灣

官莊池觀競渡

落日吹簫管清池發棹歌船爭先後渡岼激去來波水葉藏魚鳥林花間綺羅踟蹰仙女去猶似望天河

題虬上人房

禪宮分兩地釋子一為心入道無來去清言見古今江
寒池水綠山暝竹園深別有中天月遙遙散夕陰

題山中流泉

山中有流水借問不知名映地為天色飛空作雨聲轉
來深澗滿分出小池平恬澹無人見年年長自清

題陸山人樓

暮聲雜初雁夜色涵早秋獨見海中月照君池上樓山
雲拂高棟天漢入雲流不惜朝光滿其如千里遊

重寄虬上人

一作雲峰別
三看花柳朝
青山隔遠路
明月空長霄
鵲浴西江雨
雞鳴東海潮
此情勞夢寐
況道雙林遙

漢陽即事

楚國千里遠
孰知方寸違
春遊歡有客
夕寢賦無衣
江水帶水綠
桃花隨雨飛
九歌有深意
捐珮乃言歸

寒夜江口泊舟

寒潮信未起
出浦纜孤舟
一夜苦風浪
自然增旅愁
吳

山遲海月楚火照江流欲有知音者異鄉誰可求

苑外至龍興院作

朝遊天苑外忽見法筵開山勢當空出雲陰滿地來踈鐘清月殿幽梵靜花臺日暮香林下飄飄仙步迴

尋徐山人遇馬舍人

泊舟伊川右正見野人歸日暮春山綠我心清且微巖聲風雨度水氣雲霞飛復有金門客來叅蘿薜衣

渭橋北亭作

停車渭橋暮望望入秦京不見鷓鴣道如聞歌吹聲鄉
魂涉江水客路指蒲城獨有故樓月今來亭上明

隴頭水送別

相送隴山頭東西隴水流從來心膽盛今日為君愁暗
雪迷征路寒雲隱戍樓惟餘征旆影相逐去悠悠

洛陽東門送別

東城別故人臘月遲芳辰不惜孤舟去其如兩地春花
明洛陽苑水綠小平津是日不相見鶯聲徒自新

送沈校書吳中搜書

郊外亭臯遠野中岐路分
苑門臨渭水山翠雜春雲
秦閣多遺典吳臺訪闕文
君王思校理莫滯清江濱

洛橋送別

河橋送客舟河水正安流
遠見輕橈動遙憐故國遊
海禽逢早雁江月值新秋
一聽南津曲分明散別愁

秦中送人覲省

二月清江外遙遙餞故人
南山晴有雪東陌霽無塵
騎

別章臺晚舟行洛水春如君梁苑去日見白華新

洛中送人還江東

洛城春雨霽相送下江鄉樹綠天津道山明伊水陽孤
舟從此去客思一何長直望清波裏惟餘落日光

仲夏餞魏四河北覲叔

落日臨御溝送君還北州樹涼征馬去路暝歸人愁吳
嶽夏雲盡渭河秋水流東籬摘芳菊想見竹林遊

送人尋裴斐

柱史迴清憲謫居臨漢川遲君千里駕方外賞雲泉路
斷因春水山深由暝煙湘江見游女寄摘一枝蓮

張谷田舍

縣官清且儉深谷有人家一徑入寒竹小橋穿野花碓
喧春澗滿梯倚綠桑斜自說年來稔前村酒可賒

藍上芳蒨期王維補闕

山中人不見雲去夕陽過淺瀨寒魚少蘗蘭秋蝶多老
年疎世事幽性樂天和酒熟思才子谿頭望玉珂

田家即事

桑柘悠悠水醮堤晚風晴景不妨犁高機猶織卧蠶子
下坂饑逢餉饁妻春色滿林羊酪熟麥涼浮隴雉媒低
生時樂死皆由命事在旻天迴不迷

觀競渡

大夫沈楚水千祀國人哀習棹江流長迎神雨霧開標
隨綠雲動船逆清波來下怖魚龍起上驚鳬雁迴能令
秋大有鼓吹遠相催

同張侍御鼎和京兆蕭兵曹華歲晚南園

公府傳休沐私庭效陸沈方知從大隱非復在幽林闕
下忠貞志人間孝友心既將冠蓋雅仍與薜蘿深寒變
中園柳春歸上苑禽池涵青草色山帶白雲陰潘岳閒
居賦鍾期流水琴一經當自足何用遺黃金

長安道二首

鳴鞭過酒肆袷服遊倡門百萬一時盡含情無片言
西行一千里暝色生寒樹暗聞歌吹聲知是長安路

洛陽道四首獻呂四郎中

洛水春冰開洛城春樹綠
朝看大道上落花亂馬足
大道直如髮春日佳氣多
五陵貴公子雙雙鳴玉珂
春風二月時道傍柳堪把
上枝覆官閣下枝拂車馬
洛水照千門千門碧空裏
少年不得志走馬遊新市

江南曲四首

綠江深見底高浪直翻空
慣是湖邊住舟輕不畏風
逐流牽荇葉綠岸摘蘆苗
為惜鴛鴦鳥輕輕動畫橈

日暮長江裏相邀歸渡頭落花如有意來去逐船流
隔江看樹色沿月聽歌聲不是長干住那從此路行

關山月

一雁過連營繁霜覆古城胡笳在何處半夜起邊聲

同武平一員外遊湖

竹吹留歌扇蓮香入舞衣前谿多曲渚乘興莫先歸

玉真公主山居

山北天泉苑山西鳳女家不言沁園好獨隱武陵花

滄浪峽

滄浪臨古道道上若成塵自有滄浪峽誰為無事人

明妃曲


日暮驚沙亂雪飛傍人相勸易羅衣強來前殿看歌舞
共待單于夜獵歸

同武平一員外遊湖

紅荷碧篠夜相鮮孔蓋蘭橈浮翠筵舟中對舞邯鄲曲
月下雙彈盧女絃

題茅山華陽洞

華陽洞口片雲飛
細雨濛濛欲濕衣
玉簫徧滿仙壇上
應是茅家兄弟歸



石倉歷代詩選卷三十四

欽定四庫全書

集部

石倉歷代詩選卷三十五

詳校官庶吉士臣范逢恩

侍讀臣孫球覆勘

總校官進士臣朱鈐

校對官編修臣盛惇崇

謄錄監生臣史鳴岡

欽定四庫全書

石倉歷代詩選卷三十五

明 曹學佺 編

盛唐四

王維

字摩詰
太原人

奉和聖製登降聖觀與宰臣等同望應制

鳳宸朝鴈落龍圖耀金鏡維嶽降二臣戴天臨萬姓山
川八校滿井邑三農竟比屋皆可封誰家不相慶林疎

遠村出野曠寒山靜帝城雲裏深渭水天邊映佳氣含
風景頌聲溢歌詠端拱能任賢彌彰聖君聖

奉和聖製御春明樓臨右相園亭賦樂賢詩應

制

複道通長樂青門臨上路遙聞鳳吹喧聞識龍輿度寨
旒明四目伏檻紆三顧小苑接侯家飛甍映宮樹商山
原上碧澹水林端素銀漢下天章瓊筵承湛露將非富
民寵信以平戎故從來簡帝心詎得迴天步

奉和聖製送不蒙都護兼鴻臚卿歸安西應制
上卿增服命都護揚歸旆雜虜盡朝周諸胡皆自削鳴
笳瀚海曲按節陽關外落日下河源寒山靜秋塞萬方
氛稔息六合乾坤泰無戰是天心天心同覆載

扶南曲歌詞五首

翠羽流蘇帳春眠曙不開羞從面色起嬌逐語聲來早
向昭陽殿君王中使催

堂上青絃動堂前綺席陳齊歌盧女曲雙舞洛陽人傾

國徒相看寧知心所親

香氣傳空滿妝華影箔通歌聞天仗外舞出御樓中日
暮歸何處花間長樂宮

宮女還金屋將眠復畏明入春輕衣好半夜薄妝成拂
曙朝前殿玉墀多珮聲

朝日照綺窗佳人坐臨鏡散黛恨猶輕插釵嫌未正同
心勿遽遊幸待春妝竟

隴西行

十里一走馬五里一揚鞭都護軍書至匈奴圍酒泉關
山正飛雪烽戍斷無煙

從軍行

吹角動行人喧喧行人起笳悲馬嘶亂爭渡金河水日
暮沙漠陲戰聲煙塵裏盡繫名王頸歸來獻天子

早春行

紫梅發初徧黃鳥歌猶澀誰家折楊女弄春如不及愛
水看妝坐羞人映花立香畏風吹散衣愁露霑濕玉閨

青門裏日落香車入游行益相思含啼向綵帷憶君長
入夢歸晚更生疑不及紅簷燕雙栖綠草時

早朝

皎潔明星高蒼茫遠天曙槐霧暗不開城鴉鳴稍去始
聞高閣聲莫辨更衣處銀燭已成行金門儼駟馭

贈從弟司庫員外紱

少年識事淺強學干名利徒聞躍馬年苦無出人智即
事豈徒言累官非不試既寡遂性歡恐招負時累清冬

見遠山積雪凝蒼翠浩然出東林發我遺世意惠連素
清賞夙語塵外事欲緩攜手期流年一何馭

座上走筆贈薛璩慕容損

希世無高節絕跡有卑棲君徒視人文吾固和天倪緬
然萬物始及與羣牧齊分地依后稷用天信重黎春風
何豫人令我思東谿草色有佳意花枝稍含萼更待風
景好與君藉萋萋

贈李頎

聞君餌丹砂甚有好顏色不知從今去幾時生羽翼王
母翳華芝望爾崑崙側文螭從赤豹萬里方一息悲哉
世上人甘此羶腥食

贈劉藍田

籬間犬迎吠出屋候荆扉歲晏輸井稅山村人夜歸晚
田始家食餘布成我衣詎肯無公事煩君問是非

贈房盧氏琯

達人無不可忘已愛蒼生豈復少十室絃歌在兩楹浮

人日已歸但坐事農耕桑榆鬱相望邑里多雞鳴秋山
一何淨蒼翠臨寒城視事兼偃臥對書不簪纓蕭條人
吏疎鳥雀下空庭鄙夫心所尚晚節異平生將從海岳
居守靜解天刑或可累安邑茅茨君試營

贈祖三詠

蠨蛸挂虛牖蟋蟀鳴前除歲晏涼風至君子復何如高
館聞無人離居不可道閒門寂已閉落日照秋草雖有
近音信千里阻河關中復客汝潁去年歸舊山結交二

十載不得一日展貧病子既深契闊余不淺仲秋雖未
歸暮秋以為期良會詎幾日終日長相思

春夜竹亭贈錢少府歸藍田

夜靜羣動息時聞隔林犬却憶山中時人家澗西遠羨
君明發去采蕨輕軒冕

戲贈張五弟諲

吾弟東山時心尚一何遠日高猶自卧鐘動始能飯領
上髮未梳牀頭書不卷清川興悠悠空林對偃蹇青苔

石上淨細草松下軟窗外鳥聲閒階前虎心善徒然萬
象多澹爾太虛緬一知與物平自顧為人淺對君忽自
得浮念不煩遣

贈裴十迪

風景日夕佳與君賦新詩澹然望遠空如意方支頤春
風動百草蘭蕙生我籬曖曖日暖閨田家來致詞欣欣
春還臯淡淡水生陂桃李雖未開萸萼滿芳枝請君理
還策敢告將農時

贈裴迪

不相見不相見來久日日泉水頭常憶同攜手攜手本
同心復歎忽分襟相憶今如此相思深不深

與胡居士皆病寄此詩兼示學人

一興微塵念橫有朝露身如是觀蔭界何方置我人礙
有固為主趣空寧捨賓洗心詎懸解悟道正迷津因愛
果生病從貪始覺貧色聲非彼妄浮幻即吾真四達竟
何遣萬殊安可塵胡生但高枕寂莫與誰隣戰勝不謀

食理齊甘負薪子若未始異詎論疎與親

奉寄韋太守陟

荒城自蕭索萬里山河空天高秋日迴嘹唳聞歸鴻寒
塘映衰草高館落疎桐臨此歲方宴顧景詠悲翁故人
不可見寂莫平陵東

林園即事寄舍弟統

寓目一蕭散銷憂冀俄頃青草肅澄陂白雲移翠嶺後
沔通河渭前山包鄢郢松含風裏聲花對池中影地多

齊后癘人帶荊州癭徒思赤筆書詎有丹砂井心悲常
欲絕髮亂不能整清簾日何長閒門晝方靜頽思茅簷
下彌傷好風景

至滑州隔河望黎陽憶丁三寓

隔河見桑柘藹藹黎陽川望望行漸遠孤峯沒雲煙故
人不可見河水復悠然賴有政聲遠時聞行路傳

秋夜獨坐懷內弟崔興宗

夜靜群動息蟋蟀聲悠悠庭槐北風響日夕方高秋思

子整羽翰及時當雲浮吾生將白首歲晏思滄洲高足
在旦暮肯為南畝儔

和使君五郎西樓望遠思歸

高樓望所思目極情未畢枕上見千里窗中窺萬室悠
悠長路人曖曖遠郊日惆悵極浦外迢遞孤煙出能賦
屬上才思歸同下秩故鄉不可見雲水空如一

酬黎居士浙江作

儂家真箇去公定隨儂否着處是蓮花無心變楊柳松

龕藏藥裏石屑安茶白氣味當共知那能不攜手

送魏郡李太守赴任

與君伯氏別又欲與君離君行無幾日當復隔山陂蒼
茫秦川盡日落桃林塞獨樹臨關門黃河向天外前經
洛陽陌宛洛故人稀故人離別盡淇上轉驂駢企予悲
送遠惆悵睢陽路古木官渡平秋城鄴宮故想君行縣
日其出從如雲遙思魏公子復憶李將軍

送陸員外

郎署有伊人居然古人風天子顧河北詔書除征東拜
手辭上官緩步出南宮九河平原外七國薊門中陰風
悲枯桑古塞多飛蓬萬里不見虜蕭條胡地空無為費
中國更欲邀奇功遲遲前相送握手嗟異同行當封侯
歸肯訪商山翁

送宇文太守赴宣城

寥落雲外山迢遙舟中賞銑吹發西江秋空多清響地
迴古城蕪月明寒潮廣時賽敬亭神復解罟師網何處

寄相思南風吹五兩

奉送六舅歸陸渾

伯舅吏淮泗卓魯方喟然悠哉自不競退耕東臯田
條桑臘月下種杏春風前酌醴賦歸去共知陶令賢

送行

下馬飲君酒問君何所之君言不得意歸卧南山陲
但去莫復問白雲無盡時

送張五歸山

送君盡惆悵復送何人歸
幾日同攜手一朝先拂衣
東山有茅屋幸為掃荆扉
當亦謝官去豈令心事違

齊州送祖三

相逢方一笑相送還成泣
祖帳已傷離荒城復愁入
天寒遠山淨日暮長河急
解纜君已遙望君猶佇立

送從弟蕃遊淮南

讀書復騎射帶劍遊淮陰
淮陰少年輩千里遠相尋
高義難自隱明時寧陸沈
島夷九州外泉館三山深
席帆

聊問罪丹服盡成擒歸來見天子拜爵賜黃金忽思鱸
魚膾復有滄洲心天寒蒹葭渚日落雲夢林江城下楓
葉淮上聞秋砧送歸青門外車馬去駸駸惆悵新豐樹
空餘天際禽

送高道弟耽歸臨淮作

少年客淮泗落魄居下邳遨遊向燕趙結客過臨淄山
東諸侯國迎送紛交馳自爾厭游俠閉戶方垂帷深明
戴家禮頗學毛公詩備知經濟道高臥陶唐時聖主詔

天下賢人不得遺公吏奉纁組安車去茅茨君王蒼龍
闕九門十二遠羣公朝謁罷冠劍下丹墀野鶴終踉蹌
威鳳徒參差或問理人術但致還山詞天書降北闕賜
帛歸東菑都門謝親故行路日逶遲孤帆萬里外祿漫
將何之江天海陵郡雲日淮南祠杳冥滄洲上蕩漾無
人知緯蕭或賣藥出處安能期

送綦毋潛落第還鄉

聖代無隱者英靈盡來歸遂令東山客不得顧采薇既

至君門遠孰云吾道非江淮度寒食京洛縫春衣置酒
臨長道同心與我違行當浮桂棹未幾拂荆扉遠樹帶
行客孤城當落暉吾謀適不用勿謂知音稀

送張舍人佐江州同薛據十韻

東帶趨承明守官惟謁者清晨聽銀蚪薄暮辭金馬受
辭未嘗易當是方知寡清範何風流高文有風雅忽佐
江上州當自潯陽下逆旅到三湘長途應百舍香爐遠
峰出石鏡澄湖瀉董奉杏成林陶潛菊盈把范蠡常好

之廬山我心也送君思遠道欲以數行灑

送韋大夫東京留守

人外遺世慮空端結遐心曾是巢許淺始知堯舜深蒼
生詎有物黃屋如喬林上德撫神運沖和穆宸襟雲雷
康屯難江海遂飛沈天工寄人英龍袞贍君臨名器苟
不假保釐固其任素質貫方領清景照華簪慷慨念王
室從容獻官箴雲旗蔽山川畫角發龍吟晨揚天漢聲
夕卷大河陰窮人業已寧逆虜遺之擒然後解金組拂

衣東山岑給事黃門省秋光正沈沈功名與身退老病
隨年侵君子從相訪重玄其可尋

資聖寺送甘二

浮生信如寄薄宦夫何有來往本無歸別離方此受柳
色藹春餘槐陰清夏守不學御溝上銜悲執杯酒

留別山中溫古上人兄并示舍弟縉

解薜登天朝去師偶時哲豈惟山中人兼負松上月宿
昔同遊止致身雲霞末開軒臨潁陽臥視飛鳥沒好依

盤石飯屢對瀑泉渴理齊小狎隱道勝寧外物舍弟官
崇高宗兄此削髮荆扉但灑掃乘閒當過歇

觀別者

青青楊柳陌陌上別離人愛子遊燕趙高堂有老親不
行無可養行去百憂新切切委兄弟依依向四隣都門
帳飲畢從此謝親賓揮涕逐前侶含悽動征輪車徒望
不見時見起行塵吾亦辭家久看之淚滿巾

別綦毋潛

端笏明光宮歷稔朝雲陞詔刊延閣書高議平津邸適
意偶輕人虛心削繁禮盛得江左風彌工建安體高張
多絕絃截河有清濟嚴冬爽羣木伊洛方清泚渭水冰
下流潼關雪中啓荷蓀幾時還塵纓待君洗

晦日遊大理韋卿城南別業四聲次用各六韻
與世澹無事自然江海人側聞塵外遊解驂輒朱輪平
野照暄景上天垂春雲張組竟北阜汎舟過東隣故鄉
信高會牢醴及佳辰幸同擊壤樂心荷堯為君

郊居杜陵下永日同攜手仁里靄川陽平原見峯首園
廬鳴春鳩林薄媚新柳上卿始登席故老前為壽臨當
遊南陂約畧執杯酒歸歟紉微官惆悵心自咎

冬日遊覽

步出城東門試騁千里目青山橫蒼林赤日團平陸渭
北走邯鄲關東出函谷秦地萬方會來朝九州牧雞鳴
咸陽中冠蓋相追逐丞相過列侯羣公餞光祿相如方
老病獨歸茂陵宿

藍田山石門精舍

落日山水好漾舟信歸風探竒不覺遠因以緣源窮遙
愛雲木秀初疑路不同安知清流轉偶與前山通捨舟
理輕策果然愜所適老僧四五人逍遙蔭松柏朝梵林
未曙夜禪山更寂道心及牧童世事問樵客暝宿長林
下焚香臥瑤席澗芳襲人衣山月映石壁再尋畏迷誤
明發更登歷笑謝桃源人花紅復來覲

青谿

言入黃花川每逐青谿水隨山將萬轉趣途無百里聲
喧亂石中色靜深松裏漾漾汎菱荇澄澄映葭葦我心
素已閒清川澹如此請留盤石上垂釣將已矣

崔濮陽兄季重前山興

秋色有佳興況君池上閒悠悠西林下自識門前山千
里橫黛色數峯出雲間嵯峨對秦國合沓藏荆關殘雨
斜日照夕嵐飛鳥還故人今尚爾歎息此顏顏

李處士山居

君子盈天階小人甘自免方隨鍊金客林上家絕巘背
嶺花未開入雲樹深淺清晝猶自眠山鳥時一轉

丁寓田家有贈

君心尚棲隱久欲傍歸路在朝每為言解印果成趣晨
雞鳴隣里羣動從所務農夫行餉田閨妾起縫素開軒
御衣服散帙理章句時吟招隱詩或製閒居賦新晴望
郊郭日映桑榆暮陰盡小苑城微明渭川樹揆余宅間
井幽賞何由屢道存終不忘迹異難相遇此時惜離別

再來芳菲度

渭川田家

斜光照墟落窮巷牛羊歸
野老念牧童倚杖候荆扉
雝雝麥苗秀蠶眠桑葉稀
田夫荷鋤至相見語依依
即此美閒逸悵然吟式微

春中田園作

屋上春鳩鳴村邊杏花白
持斧伐遠楊荷鋤覘泉脉
歸燕識故巢舊人看新厯
臨觴忽不御惆悵遠行客

過李揖宅

閒門秋草色終日無車馬客來深巷中犬吠寒林下散
髮時未簪道書行尚把與我同心人樂道安貧者一罷
宜城酌還歸洛陽社

飯覆釜山僧

晚知清淨理日與人羣疎將候遠山僧先期掃弊廬果
從雲峯裏顧我蓬蒿居藉草飯松屑焚香看道書然燈
晝欲盡鳴磬夜方初一悟寂為樂此生閒有餘思歸何

必深身世猶空虛

謁璿上人

少年不足言識道年已長事往安可悔餘生幸能養誓
從斷臂血不復嬰世網浮名寄纓佩空性無羈鞅夙承
大導師焚香此瞻仰頽然居一室覆載紛萬象高柳早
鶯啼長廊春雨響牀下阮家屐窗前筇竹杖方將見身
雲陋彼示天壤一心在法要願以無生獎

瓜園詩

余適欲鋤瓜倚鋤聽叩門鳴騶導驄馬常從夾朱軒窮
巷正傳呼故人儻相存攜手追涼風放心望乾坤藹藹
帝王州宮觀一何繁林端出綺道殿頂搖華幡素懷在
青山若值白雲屯迴風城西雨返景原上村前酌盈樽
酒往往聞清言黃鸝轉深木朱槿照中園猶羨松下客
石上聞清猿

自大散以往深林密竹磴道盤曲四五十里至

黃牛嶺見黃花川

危徑幾萬轉數里將三休迴環見徒侶隱映隔林丘
颯松上雨潺潺石中流靜言深谿裏長嘯高山頭望見
南山陽白露靄悠悠青臯麗已淨綠樹鬱如浮曾是厭
蒙密曠然銷人憂

新晴野望

新晴原野曠極目無氛垢郭門臨渡頭村樹連谿口
白
水明田外碧峰出山後農月無閒人傾家事南畝

宿鄭州

朝與周人辭暮投鄭人宿他鄉絕儔侶孤客親僮僕宛
洛望不見秋霖晦平陸田父草際歸村童雨中牧主人
東臯上時稼遶茅屋蟲思機杼悲雀喧禾黍熟明當渡
京水昨晚猶金谷此去欲何言窮邊狗微祿

渡河到清河作

汎舟大河裏積水窮天涯天波忽開圻郡邑千萬家行
復見城市宛然有桑麻迴瞻舊鄉國淼漫連雲霞

苦熱

赤日滿天地火雲成山嶽草木盡焦卷川澤皆竭涸輕
紈覺衣重密樹苦陰薄莞簟不可近絺綌再三濯思出
宇宙外曠然在寥廓長風萬里來江海蕩煩濁却顧身
為患始知心未覺忽入甘露門宛然清涼樂

納涼

喬木萬餘株清流貫其中前臨大川口豁達來長風漣
漪涵白沙素鮪如遊空偃卧磐石上翻濤沃微躬漱流
復濯足前對釣魚翁貪餌凡幾許徒思蓮葉東

西施詠

豔色天下重西施寧久微朝仍越谿女暮作吳宮妃賤
日豈殊衆貴來方悟稀邀人傳香粉不自着羅衣君寵
益嬌態君憐無是非當時浣紗伴莫得同車歸持謝隣
家子效顰安可希

李陵詠

漢家李將軍三代將門子結髮有奇策少年成壯士長
驅塞上兒深入單于壘旌旗列相向簫鼓悲何已日暮

沙漠陸戰聲煙塵裏將令驕虜滅豈獨名王侍既失大
軍援遂嬰穹廬耻少小蒙漢恩何堪坐思此深衷欲有
報投軀未能死引領望子卿非君誰相理

濟上四賢詠崔錄事

解印歸田里賢哉此大夫少年曾任俠晚節更為儒
跡東山下因家滄海隅已聞能狎鳥余欲共乘桴

鄭霍二山人

翩翩繁華子多出金張門幸有先人業早蒙明主恩
童

年且未學肉食鶩華軒豈乏林中士無人薦至尊鄭公
老泉石霍子安丘樊賣藥不二價著書盈萬言息陰無
惡木飲水必清源吾賤不及議斯人竟誰論

燕子龕禪師

山中燕子龕路劇羊腸惡裂地競盤屈挿天多峭崿瀑
泉吼而噴怪石看欲落伯禹訪未知五丁愁不鑿上人
無生緣生長居紫閣六時自搥磬一飲常帶索種田燒
白雲斫漆響丹壑行隨拾栗猿歸對巢松鶴時許山神

請偶逢洞仙博救世多慈悲即心無行作周商倦積阻
蜀物多淹泊巖腹乍旁穿澗脣時外拓橋因倒樹架柵
值垂藤縛鳥道悉已平龍宮為之涸跳波誰揭厲絕壁
免捫摸山木日陰陰結跣歸舊林一向石門裏任君春
草深

羽林騎閨人

秋月臨高城城中管絃思離人堂上愁穉子階前戲出
門復映戶望望青絲騎行人過欲盡狂夫終不至左右

寂無言相看共垂淚

偶然作六首

楚國有狂夫茫然無心想散髮不冠帶行歌南陌上孔
氏與之言仁義莫能獎未嘗肯問天何事須擊壤復笑
采薇人胡為乃長往

田舍有老翁垂白衡門裏有時農事閒斗酒呼隣里喧
聒茅簷下或坐或復起短褐不為薄園葵固足美動則
長子孫不曾向城市五帝與三王古來稱君子干戈將

揖讓畢竟何者是得意苟為樂野田安足鄙且當放懷
去行行沒餘齒

日夕見太行沈吟未能去問君何以然世網嬰我故小
妹日成長兄弟未有娶家貧祿既薄儲蓄非有素幾迴
欲奮飛踟躕復相顧孫登長嘯臺松竹有遺處相去詎
幾許故人在中路愛染日已薄禪寂日已固忽乎吾將
行寧俟歲云暮

陶潛任天真其性頗耽酒自從棄官來家貧不能有九

月九日時菊花空滿手中心竊自思儻有人送否白衣
攜壺觴果來遺老叟且喜得斟酌安問升與斗奮衣野
田中今日嗟無負兀傲迷東西蓑笠不能守傾倒强行
行酣歌歸五柳生事不曾問肯愧家中婦

趙女彈箜篌復能邯鄲舞夫婿輕薄兒鬪雞事齊主黃
金買歌笑用錢不復數許史相經過高門盈四牡客舍
有儒生昂藏出鄒魯讀書三十年腰下無尺組被服聖
人教一生自窮苦

老來懶賦詩惟有老相隨宿世謬詞客前身應畫師不
能捨餘習偶被時人知名字本皆是此心還不知

寓言二首

朱紱誰家子無乃金張孫驪駒從白馬出入銅龍門問
爾何功德多承明主恩鬪雞平樂館射雉上林園曲陌
車騎盛高堂珠翠繁奈何軒冕貴不與布衣言

君家御溝上垂楊夾朱門列鼎會中貴鳴珂朝至尊生
死在八議窮達由一言須識苦寒士莫矜孤白溫

冬夜書懷

冬宵寒且永夜漏宮中發草白靄繁霜木衰澄清月麗
服映頽顏朱燈照華髮漢家方尚少顧影慚朝謁

哭殷遥

人生能幾何畢竟歸無形念君等為死萬事傷人情慈
母未及葬一女纔十齡決淋寒郊外蕭條聞哭聲浮雲
為蒼茫飛鳥不能鳴行人何寂寞白日自淒清憶昔君
在時問我學無生勸君苦不早令君無所成故人各有

贈又不及平生負爾非一途慟哭返柴荆

故南陽夫人樊氏挽歌

石窳恩榮重金吾車騎盛將朝每贈言入室還相敬疊
鼓秋城動懸旌寒日映不言長不歸環珮猶將聽

夷門歌

七雄雄雌猶未分攻城殺將何紛紛秦兵益圍邯鄲急
魏王不救平原君公子為嬴停四馬執轡愈恭意愈下
亥為屠肆鼓刀人嬴乃夷門抱關者非但慷慨獻奇謀

意氣兼將身命酬向風刎頸送公子七十老翁何所求

隴頭吟

長城少年游俠客
夜上戍樓看太白
隴頭明月迴臨關
隴上行人夜吹笛
關西老將不勝愁
駐馬聽之雙淚流
身經大小百餘戰
麾下偏裨萬戶侯
蘇武纔為典屬國
節旄空盡海西頭

老將行

少年十五二十時
步行奪取胡馬騎
射殺山中白額虎

肯數鄴下黃鬚兒一身轉戰三千里一劍曾當百萬師
漢兵奮迅如霹靂虜騎崩騰畏疾藜衛青不敗由天幸
李廣無功緣數奇自從棄置便衰朽世事蹉跎成白首
昔時飛箭無全目今日垂楊生左肘路傍時賣故侯瓜
門前學種先生柳蒼茫古木連窮巷遼落寒山對虛牖
誓令疏勒出飛泉不似潁川空使酒賀蘭山下陣如雲
羽檄交馳日夕聞節使三河募年少詔書五道出將軍
試拂鐵衣如雪色聊持寶劍動星文願得燕弓射天將

耻令越甲鳴吾君莫嫌舊日雲中守猶堪一戰立功勲

燕支山

漢家天將才且雄時來謁帝明光宮萬乘親推雙闕下
千官出餞五陵東誓將甲第金門裏身作長城玉塞中
衛霍纔堪一騎將朝廷不數貳師功趙魏韓燕多勁卒
關西俠少何咆勃報讎只是聞嘗膽飲酒不曾妨刮骨
畫戟雕戈白日寒連旗大旆黃塵沒疊鼓遙翻瀚海波
鳴笳亂動天山月麒麟錦帶佩吳鉤颯沓青驪躍紫騮

拔劍已斷天驕臂歸鞍共飲月支頭漢兵大呼一當百
虜騎相看哭且愁教戰雖令赴湯火終知上將先伐謀

桃源行

漁舟逐水愛山春兩岸桃花夾去津坐看紅樹不知遠
行盡青谿不見人山口潛行始隈隩山開曠望旋平陸
遙看一處攢雲樹近入千家散花竹樵客初傳漢姓名
居人未解秦衣服居人共住武陵源還從物外起田園
月明松下房櫳靜日出雲中雞犬喧驚聞俗客爭來集

競引還家問都邑平明閭巷掃花開薄暮漁樵乘水入
初因避地去人間及至成仙遂不還峽裏誰知有人事
世中遙望空雲山不疑靈境難聞見塵心未盡思鄉縣
出洞無論隔山水辭家終擬長游衍自謂經過舊不迷
安知峰壑今來變當時只記入山深青谿幾曲到雲林
春來遍是桃花木不辨仙源何處尋

洛陽女兒行

洛陽女兒對門居纔可容顏十五餘良人玉勒乘驄馬

侍女金盤膾鯉魚畫閣朱樓盡相望紅桃綠柳垂簷向
羅幃送上七香車寶扇迎歸九華帳狂夫富貴在青春
意氣驕奢劇季倫自憐碧玉親教舞不惜珊瑚持與人
春窗曙滅九微火九微片片飛花璵戲罷曾無理曲時
妝成祇是薰香坐城中相識盡繁華日夜經過趙李家
誰憐越女顏如玉貧賤江頭自浣紗

同崔傅答賢弟

洛陽才子姑蘇客桂苑殊非故鄉陌九江楓樹幾回青

一片揚州五湖白揚州時有下江兵蘭陵鎮前吹笛聲
夜火人歸富春郭秋風鶴唳石頭城周郎陸弟為儔侶
對舞前溪歌白紵曲几書留小史家草堂碁賭山陰墅
衣冠若話外臺臣先數夫君席上珍更聞臺閣求三語
遙想風流第一人

贈吳官

長安客舍熱如煮無箇茗糜難御暑空搖白團其諦苦
欲向縹囊還歸旅江鄉鯖鮓不寄來秦人湯餅那堪許

不如儂家任挑達草屨撈蝦富春渚

故人張諲工詩善易卜兼能丹青草隸頃以詩
見贈聊獲酬之

不逐城東遊俠兒
隱囊紗帽坐彈碁
蜀中夫子時開卦
洛下書生解咏詩
藥欄花逕衡門裏
時復據梧聊隱几
屏風誤點惑孫郎
團扇草書輕內史
故園高枕度三春
永日垂帷絕四隣
自想蔡邕今已老
更將書籍與何人

送崔五太守

長安廐吏來到門朱文露網動行軒黃花縣西九折坂
玉樹宮南五丈原褒斜谷中不容憶惟有白雲當露冕
子午山裏杜鵑啼嘉陵水頭行客飯劒門忽斷蜀川開
萬井雙流滿眼來霧中遠樹刀州出天際澄江已字迴
使君年紀三十餘少年白晢專城居欲持畫省郎官筆
迴與臨邛父老書

寒食城東即事

清谿一道穿桃李演漾綠蒲涵白芷谿上人家凡幾家

落花半落東流水蹴踘屢過飛鳥上鞦韆競出垂楊裏
少年分日作遨遊不用清明兼上已

不遇詠

北闕獻書寢不報南山種田時不登百人會中身不預
五侯門前心不能身投河朔飲君酒家在茂陵平安否
且此登山復臨水莫問春風動楊柳今人作人多自私
我心不說君應知濟人然後拂衣去肯作徒爾一男兒

青雀歌

青雀翅羽短未能遠食玉山禾猶勝黃雀爭上下唧唧
空倉復若何

新秦郡松樹歌

青青山上松數里不見今更逢不見君心相憶此心向
君君應識為君顏色高且閒亭亭迴出浮雲間

榆林郡歌

山頭松柏林山下泉聲傷客心千里萬里春草色黃河
東流流不息黃龍戍上游俠兒愁逢漢使不相識

問寇校書雙谿

君家少室西為復少室東別來幾日今春風新買雙谿
定何似餘生欲寄白雲中

寄崇梵僧

崇梵僧崇梵僧秋歸覆釜春不還落花啼鳥紛紛亂澗
戶山牕寂寂閒峽裏誰知有人事郡中遙望空雲山

同比部楊員外十五夜遊有懷靜者季

承明少休沐建禮省文書夜漏行人息歸鞍落日餘懸

知三五夕萬戶千門闌夜出曙翻歸傾城滿南陌陌頭
馳騁盡繁華王孫公子五侯家由來明月如白日共道
春燈勝百花聊看侍中千寶騎強識小婦七香車寶馬
共喧闐箇裏多情俠少年競向長楊柳市北肯過精舍
竹林前獨有仙郎心寂寞却將宴坐為行樂儻覺忘懷
共往來幸霑同舍甘藜藿

答張五弟

終南有茅屋前對終南山終年無客常閉關終日無心

長自閒不妨飲酒復垂釣君但能來相往還

雪中憶李楫

積雪滿阡陌故人不可期
長安千門復萬戶何處躑蹌
黃金羈

送李睢陽

將置酒思悲翁使君去出城東
麥漸漸雉子斑槐陰陰
到潼關騎連連車遲遲心中悲
宋又遠周間之南淮夷
東齊兒碎碎織練與素絲
遊人賈客信難持五穀前熟

方可為下車閉閣君當思天子當殿儼衣裳太官尚食
陳羽觴彤庭散綬垂鳴璫黃紙詔書出東廂輕紈疊綺
爛生光宗室子弟君最賢分憂當為百辟先布衣一言
相為死何況聖主恩如天鸞聲噦噦魯侯旂明年上計
朝京師須憶今日斗酒別慎勿富貴忘我為

迎神曲

坎坎擊鼓魚山之下吹洞簫望極浦女巫進紛屢舞陳
瑶席湛清醑風淒淒兮夜雨神之來兮不來使我心兮

苦復苦

送神曲

紛進拜兮堂前目眷眷兮瓊筵來不語兮意不傳作暮
雨兮愁空山悲急管思繁絃靈之駕兮儼欲旋倏雲收
兮雨歇山青青兮水潺潺

奉和聖製賜史供奉曲江讌應制

侍從有鄒枚瓊筵就水開言陪柏梁宴新下建章來對
酒山河滿移舟草樹迴天文同麗日駐景惜行杯

從岐王過楊氏別業應教

楊子談經所准王
載酒過興闌啼鳥換坐久落花多
逕轉迴銀燭林開散玉珂
嚴城時未啓前路擁笙歌

從岐王夜讌衛家山池應教

座客香貂滿宮娃綺幔張
澗花輕粉色山月少燈光
積翠紗窗暗飛泉繡戶涼
還將歌舞出歸路莫愁長

早朝

柳暗百花明春深五鳳城
城烏睥睨曉宮井轆轤聲
方

朔金門侍班姬玉輦迎仍聞遣方士東海訪蓬瀛

同崔員外秋宵寓直

建禮高秋夜承明候曉過九門寒漏徹萬井曙鐘多月
迴藏珠斗雲消出絳河更慙衰朽質南陌共鳴珂

輞川閒居贈裴秀才迪

寒山轉蒼翠秋水日潺湲倚杖柴門外臨風聽暮蟬渡
頭餘落日墟里上孤煙復值接輿醉狂歌五柳前

寄荊州張丞相

所思竟何在，悵望深荆門。舉世無相識，終身思舊恩。方將與農圃，藝植老丘園。目盡南無雁，何由寄一言。

冬晚對雪憶胡居士家

寒更傳曉箭，清鏡覽衰顏。隔牖風驚竹，開門雪滿山。灑空深巷靜，積素廣庭閒。借問袁安舍，脩然尚閉關。

和尹諫議史館山池

雲館接天居，霓裳侍玉除。春池百子外，芳樹萬年餘。洞有仙人錄，山藏太史書。君恩深漢帝，且莫上空虛。

奉和楊駙馬六郎秋夜即事

高樓月似霜
秋夜鬱金堂
對坐彈廬女
同看舞鳳凰
少兒多送酒
小吏更焚香
結束平陽騎
明朝入建章

酬虞部蘇員外過藍田別業不見留之作

貧居依谷口
喬木帶荒村
石路枉迴駕
山家誰候門
漁舟膠凍浦
獵火燒寒原
惟有白雲外
疎鐘聞夜猿

酬比部楊員外暮宿琴臺朝躋書閣率爾見贈
之作

舊簡拂塵看鳴琴候月彈桃源迷漢姓松樹有秦官空
谷歸人少青山昔日寒羨君棲隱處遙望白雲端

酬嚴少尹徐舍人見過不遇

公門暇日少窮巷故人稀偶值乘藍輦非關避白衣不
知炊黍否誰解掃荆扉君但傾茶椀無妨騎馬歸

酬張少府

晚年惟好靜萬事不關心自顧無長策空知返舊林松
風吹解帶山月照彈琴君問窮通理漁歌入浦深

送丘為落第歸江東

憐君不得意，況復柳條春。
為客黃金盡，還家白髮新。
五湖三畝宅，萬里一歸人。
知禰不能薦，羞稱獻納臣。

送李判官赴東江

聞道皇華使，方隨皐蓋臣。
封章通左語，冠冕化丈身。
樹色分楊子，潮聲滿富春。
遙知辨璧吏，恩到泣珠人。

送嚴秀才還蜀

寧親為令子，似舅即賢甥。
別路經花縣，還鄉入錦城。
山

臨青塞斷江向白雲平獻賦何時至明君憶長卿

送張判官赴河西

單車曾出塞報國敢邀勲見逐張征虜今思霍冠軍沙
平連白雪蓬卷入黃雲慷慨倚長劍高歌一送君

送岐州源長史歸

握手一相送心悲安可論秋風正蕭索客散孟嘗門故
驛通槐里長亭下槿原征西舊旌節從此向河源

送張道士歸山

先生何處去王屋訪毛君別婦留丹訣驅雞入白雲人
間若剩住天上復離羣當作遼城鶴仙歌使爾聞

同崔興宗送衡嶽瑗公南歸

并序

衡嶽瑗上人者嘗學道于五峯蔭松棲雲與狼虎
雜處得無所得矣天寶癸巳歲始遊于長安手提
瓶笠至自萬里燕居吐論緇屬高之初給事中房
公謫居宜春與上人風土相接因為道友伏臘往
來房公既海內盛名上人亦以此增價秋九月杖

錫南返扣門來別秦地草木槭槭已黃蒼梧白雲
不日而見滇陽有曹谿學者為我謝之

言從石菡閣新下穆陵關獨向池陽去白雲留故山綻
衣秋日裏洗鉢古松間一施傳心法惟將戒定還

送錢少府還藍田

草色日向好桃源人去稀手持平子賦目送老萊衣每
候山櫻發時同海燕歸今年寒食酒應是返柴扉

送丘為往唐州

宛洛有風塵君行多苦辛
四愁連漢水百口寄隨人
槐色陰清晝楊花惹暮春
朝端肯相送天子繡衣臣

送元中丞轉運江淮

薄賦歸天府輕徭賴使臣
歡霑賜帛老恩及卷綃人
去問珠官俗來經石蚌春
東南御亭上莫使有風塵

送崔九興宗遊蜀

送君從此去轉覺故人稀
徒御猶回首田園方掩扉
出門當旅食中路授寒衣
江漢風流地遊人何歲歸

送崔興宗

已恨親皆遠誰憐友復稀
君王未西顧遊宦盡東歸
塞迴山河淨天長雲樹微
方同菊花節相待洛陽扉

送平澹然判官

不識陽關路新從定遠侯
黃雲斷春色畫角起邊愁
瀚海經年到交河出塞流
須令外國使知飲月氏頭

送劉司直赴安西

絕域陽關道胡沙與塞塵
三春時有雁萬里少行人
昔

宿隨天馬蒲萄逐漢臣當令外國懼不敢覓和親

送趙都督赴代州得青字

天官動將星漢上柳條青萬里鳴刁斗三軍出井陘忘
身辭鳳闕報國取龍庭豈學書生輩窗間老一經

送方城韋明府

遙思葭蔕際寥落楚人行高鳥長淮水平蕪故郢城使
車聽雉乳縣鼓應雞鳴若見州從事無嫌手板迎

送梓州李使君

萬壑樹參天，千山響杜鵑。
山中一夜雨，樹杪百重泉。
漢女輸幢布，巴人訟芋田。
丈翁翻教授，不敢倚先賢。

送張五諲歸宣城

五湖千萬里，況復五湖西。
漁浦南陵郭，人家春穀谿。
欲歸江淼淼，未到草萋萋。
憶想蘭陵鎮，可宜猿更啼。

送友人南歸

萬里春應盡，三江雁亦稀。
連天漢水廣，孤客郢城歸。
鄖國稻苗秀，楚人菰米肥。
懸知倚門望，遙識老萊衣。

送賀遂員外外甥

南國有歸舟，荆門沂上流。
蒼茫葭菼外，雲水與昭丘。
攜城烏去，江連暮雨愁。
猿聲不可聽，莫向楚山秋。

送楊長史赴果州

裊斜不容幘之子，去何之鳥道。
一千里猿聲，十二時官橋。
祭酒客山木，女郎祠別後。
同明月君應聽子規。

送邢桂州

鏡吹喧京口，風波下洞庭。
赭圻將赤岸，擊汰復揚舲。
日

落江湖白潮來天地青明珠歸合浦應逐使臣星

送崔三往密州覲省

南陌去悠悠東郊不少留同懷扇枕戀獨念倚門愁路
遶天山雪家臨海樹秋魯連功未報且莫蹈滄洲

送孟六歸襄陽

杜門不復出久與世情疎以此為長策勸君歸舊廬醉
歌田舍酒笑讀古人書好是一生事無勞獻子虛

初出濟州別城中故人

微官易得罪謫去濟川陰執政方持法明君無此心間
閻河潤上井邑海雲深縱有歸來日各愁年鬢侵

與盧象集朱家

主人能愛客終日有逢迎貫得新豐酒復聞秦女箏柳
條疎客舍槐葉下秋城語笑且為樂吾將達此生

登裴秀才廸小臺

端居不出戶滿目望雲山落日鳥邊下秋原人外閒遙
知遠林際不見此簷間好客多乘月應門莫上關

遊李山人所居因題屋壁

世人皆如夢狂來或自歌問年松樹老有地竹林多藥
倩韓康賣門容尚子過翻嫌枕席上無那白雲何

過崔駙馬山池

畫樓吹笛妓金碗酒家胡錦石稱貞女青松學大夫脫
貂貫桂醕射雁與山厨聞道高陽會愚公谷正愚

過福禪師蘭若

巖壑轉微逕雲林隱法堂羽人飛奏樂天女跪焚香竹

外峯偏曙藤陰水更涼欲知禪坐久行路長春芳

過香積寺

不知香積寺數里入雲峯古木無人逕深山何處鐘泉
聲咽危石日色冷青松薄暮空潭曲安禪制毒龍

過感化寺曇興上人山院

暮持筇竹杖相待虎谿頭催客聞山響歸房逐水流野
花叢發好谷鳥一聲幽夜坐空林寂松風直似秋

登辨覺寺

竹逕從初地蓮峯出化城牕中三楚盡林上九江平軟
草乘趺坐長松響梵聲空居法雲外觀世得無生

喜祖三至留宿

門前洛陽客下馬拂征衣不枉故人駕平生多掩扉行
人返深巷積雪帶餘暉早歲同袍者高車何處歸

黎拾遺昕裴秀才迪見過秋夜對雨之作

促織鳴已急輕衣行向重寒燈坐高館秋雨聞疎鐘白
法調狂象玄言問老龍何人顧蓬徑空愧求羊蹤

晚春嚴少尹與諸公見過

松菊荒三徑圖書共五車烹葵邀上客看竹到貧家
鵲乳先春草鶯啼過落花自憐黃髮暮一倍惜年華

山居秋暝

空山新雨後天氣晚來秋明月松間照清泉石上流
竹喧歸浣女蓮動下漁舟隨意春芳歇王孫自可留

終南別業

中歲頗好道晚家南山陲興來每獨往勝事空自知
行

到水窮處坐看雲起時偶然值林叟談笑無還期

歸嵩山作

清川帶長薄車馬去閒閒流水如有意暮禽相與還荒
城臨古渡落日滿秋山迢遞嵩高下歸來且閉關

歸輞川作

谷口疎鐘動漁樵稍欲稀悠然遠山暮獨向白雲歸菱
蔓弱難定楊花輕易飛東臯春草色惆悵掩柴扉

韋給事山居

幽尋得此地詎有一人曾大壑隨階轉羣山入戶登庖
厨出深竹印綬隔垂藤即事辭軒冕誰云病未能

山居即事

寂莫掩柴扉蒼茫對落暉鶴巢松樹徧人訪華門稀綠
竹含新粉紅蓮落故衣渡頭煙火起處處采菱歸

終南山

太乙近天都連山到海隅白雲迴望合青藹入看無分
野中峯變陰晴衆壑殊欲投人處宿隔水問樵夫

輞川閒居

一從歸白社不復到青門時倚檐前樹遠看原上村青
菰臨水映白鳥向山翻寂寞於陵子桔槔方灌園

春園即事

宿雨乘輕屐春寒著敝袍開畦分白水間柳發紅桃草
際成基局林端舉桔槔還持鹿皮几日暮隱蓬蒿

淇上田園即事

屏居淇水上東野曠無山日隱桑柘外河明閭井間牧

童望村去獵犬隨人還靜者亦何事荆扉乘晝關

涼州郊外遊望

野老纔三戶邊村少四隣婆娑依里社簫鼓賽田神醜
酒澆芻狗焚香拜木人女巫紛屢舞羅襪自生塵

觀獵

風勁角弓鳴將軍獵渭城草枯鷹眼疾雪盡馬蹄輕忽
過新豐市還歸細柳營迴看射鵰處千里暮雲平

春日上方即事

好讀高僧傳時看辟穀方鳩形將刻杖龜殼用支牀柳
色春山映梨花夕鳥藏北牕桃李下閒坐但焚香

漢江臨汎

楚塞三湘接荆門九派通江流天地外山色有無中郡
邑浮前浦波瀾動遠空襄陽好風日留醉與山翁

汎前陂

秋空自明迴况復遠人間暢以沙際鶴兼之雲外山澄
波澹將夕清月皓方閒此夜任孤棹夷猶殊未還

登河北城樓作

井邑傳巖上客亭雲霧間
高城眺落日極浦映蒼山
岸火孤舟宿漁家夕鳥還
寂寥天地暮心與廣川閒

千塔主人

逆旅逢佳節征帆未可前
窗臨汴河水門渡楚人船
雞犬散墟落桑榆蔭遠田
所居人不見枕席坐雲烟

使至塞上

單車欲問邊屬國過居延
征蓬出漢塞歸雁入胡天
大

漠孤烟直長河落日圓蕭關逢候吏都護在燕然

晚春歸思

新妝可憐色落日卷羅帷
鑪氣清珍簾牆陰上玉墀
春蟲飛網戶暮雀隱花枝
向晚多愁思閒牕桃李時

秋夜獨坐

獨坐悲雙鬢空堂欲二更
雨中山果落燈下草蟲鳴
白髮終難變黃金不可成
欲知除老病惟有學無生

待儲光義不至

重門朝已啟，起坐聽車聲。
要欲聞清佩，方將出戶迎。
晚鐘鳴上苑，疎雨過春城。
了自不相顧，臨堂空復情。

聽宮鶯

春樹遶宮牆，宮鶯囀曙光。
忽驚啼暫斷，移處弄還長。
隱葉棲承露，攀花出未央。
遊人未應返，為此始思鄉。

過始皇墓

古墓成蒼嶺，幽宮象紫臺。
星辰七曜隔，河漢九泉開。
有海人寧渡，無春雁不迴。
更聞松韻切，疑是大夫哀。

奉和聖製從蓬萊向興慶閣道中留春雨中春
望之作應制

渭水自縈秦塞曲黃山舊遶漢宮斜鑾輿迴出仙門柳
閣道迴看上苑花雲裏帝城雙鳳闕雨中春樹萬人家
為乘陽氣行時令不是宸遊玩物華

大同殿柱產玉芝龍池上有慶雲神光照殿百
官共覩聖恩便賜宴樂敢書即事

欲笑周文歌宴鎬遙輕漢武樂橫汾豈如玉殿生三秀

詎有銅池出五雲陌上堯樽傾北斗樓前舜樂動南薰
共歡天意同人意萬歲千秋奉聖君

敕賜百官櫻桃

芙蓉闕下會千官紫禁朱櫻出上闌纔是寢園春薦後
非關御苑鳥啣殘歸鞍競帶青絲籠中使頻傾赤玉盤
飽食不須愁內熱大官還有蔗漿寒

敕借岐王九成宮避暑應教

帝子遠辭丹鳳闕天書遙借翠微宮隔窗雲霧生衣上

卷幔山泉入鏡中
林下水聲喧語笑
巖間樹色隱房櫳
仙家未必能勝此
何事吹笙向碧空

和賈舍人早朝大明宮之作

絳幘雞人送曉籌
尚衣方進翠雲裘
九天闔闔開宮殿
萬國衣冠拜冕旒
日色纔臨仙掌動
香烟欲傍衮龍浮
朝罷須裁五色詔
珮聲歸向鳳池頭

和太常帝主簿五郎溫湯寓目之作

漢主離宮接露臺
秦川一半夕陽開
青山盡是朱旗繞

碧澗翻從玉殿來，新豐樹裏行人度。
小苑城邊獵騎迴，聞道甘泉能獻賦。
懸知獨有子雲才。

苑舍人能書梵字，兼達梵音，皆曲盡其妙戲為之贈。

名儒待詔滿公車，才子為郎典石渠。
蓮花法藏心懸悟，貝葉經文手自書。
楚詞共許勝揚馬，梵字何人辨魯魚。
故舊相望在三事，願君莫厭承明廬。

酬郭給事

洞門高閣靄餘暉
桃李陰陰柳絮飛
禁裏疎鐘官舍晚
省中啼鳥吏人稀
晨搖玉珮趨金殿
夕奉天書拜瑣闥
強欲從君無那老
將因卧病解朝衣

出塞作

居延城外獵天驕
白草連山野火燒
暮雲空磧時驅馬
秋日平原好射鵰
護羌校尉朝乘障
破虜將軍夜度遼
玉靶角弓珠勒馬
漢家將賜霍嫖姚

送方尊師歸嵩山

仙官欲往九龍潭毛節朱幡倚石龕山壓天中半天上
洞穿江底出江南瀑布杉松常帶雨夕陽彩翠忽成嵐
借問迎來雙白鶴已曾衡嶽送蘓耽

送楊少府貶郴州

明到衡山與洞庭若為秋月聽猿聲愁看北渚三湘遠
惡說南風五兩輕青草瘴時過夏口白頭浪裏出益城
長沙不久留才子賈誼何須弔屈平

過乘如禪師蕭居士嵩丘蘭若

無着天親弟與兄
嵩丘蘭若一峯晴
食隨鳴磬巢烏下
行踏空林落葉聲
迸水定侵香案濕
雨花應共石牀平
深洞長松何所有
儼然天竺古先生

酌酒與裴迪

酌酒與君君自寬
人情翻覆似波瀾
白首相知猶按劍
朱門先達笑彈冠
草色全經細雨濕
花枝欲動春風寒
世事浮雲何足問
不如高卧且加餐

輞川別業

不到東山向一年歸來纔及種春田雨中草色綠堪染
水上桃花紅欲然優婁比丘經論學偃僂丈人鄉里賢
披衣倒屣且相見相歡語笑衡門前

早秋山中作

無才不敢累明時思向東谿守故籬豈厭向平婚嫁早
却嫌陶令去官遲草間蛩響臨秋急山裏蟬聲薄暮悲
寂寞柴門人不到空林獨與白雲期

積雨輞川莊作

積雨空林煙火遲
蒸蒸爇黍餉東菑
漠漠水田飛白鷺
陰陰夏木轉黃鸝
山中習靜觀朝槿
松下清齋折露葵
野老與人爭席罷
海鷗何事更相疑

聽百舌鳥

上蘭門外草萋萋
未央宮中花裏栖
亦有相隨過御苑
不知若箇向金堤
入春解作千般語
拂曙能先百鳥啼
萬戶千門應覺曉
建章何必聽鳴雞

奉和聖製與太子諸王三月三日龍池春禊應

制

故事修春禊新宮展豫遊明君移鳳輦太子出龍樓賦
掩陳王作杯如洛水流金人來捧劍畫鷁去迴舟苑樹
浮宮闕天池照見旒宸章在雲表垂象滿皇州

奉和聖製上巳于望春亭觀禊飲應制

長樂青門外宜春小苑東樓開萬井上輦過百花中畫
鷁移仙仗金貂列上公清歌邀落日妙舞向春風渭水
明秦甸黃山入漢宮君王來被禊灞澹亦朝宗

奉和聖製暮春送朝集使歸郡應制

萬國仰宗周衣冠拜冕旒玉乘迎大客金節送諸侯祖
席傾三省褰帷向九州楊花飛上路槐色陰通溝來預
鈞天樂歸分漢主憂宸章類河漢垂象滿中州

三月三日曲江侍宴應制

萬乘親齋祭千官喜豫遊奉迎從上苑袂襖向中流草
樹連容衛山河對冕旒畫旗搖浦淑春服滿汀洲仙籟
龍媒下神臯鳳蹕留從今億萬歲天寶紀春秋

三月三日勤政樓侍宴應制

綵仗連宵合瓊樓拂曙通年光三月裏宮殿百花中不
數秦王日誰將洛水同酒筵嫌落絮舞袖怯春風天保
無為德人歡不戰功仍臨九衢宴更達四門聰

奉和聖製十五夜然燈繼以酺宴應制

上路笙歌滿春城刻漏長遊人多晝日明月讓燈光魚
鑰通翔鳳龍輿出建章九衢陳廣樂百福透名香仙伎
來金殿都人遶玉堂定應偷妙舞從此學新妝奉引迎

三事司儀列萬方願將天地壽同以獻君王

奉和聖製幸玉真公主山莊因題石壁十韻之

作應制

碧落風煙外瑤臺道路賒如何連帝苑別自有仙家比
地迴鸞駕緣谿轉翠華洞中開日月窗裏發雲霞庭養
冲天鶴谿流上漢查種田生白玉泥竈化丹砂谷靜泉
逾響山深日易斜御羹和石髓香飯進胡麻大道今無
外長生詎有涯還瞻九霄上來往五雲車

春日直門下省早朝

騎省直明光雞鳴謁建章遙聞侍中珮闥識令中香玉
漏隨銅吏天書拜夕郎旌旗映閭闔歌吹滿昭陽官舍
梅初紫宮門柳欲黃願將遲日意同與聖恩長

和宋中丞夏日遊福賢觀天長寺即陳相宅所
施之作

已相殷王國空餘尚父谿釣磯開月殿築道出雲梯積
水浮香象深山鳴白雞虛空陳伎樂衣服製虹霓墨點

三千界丹飛六一泥桃源勿遽返再訪恐君迷

送秘書晁監還日本國

積水不可極安知滄海東九州何處遠萬里若乘空向
國惟看日歸帆但信風鰲身映天黑魚眼射波紅鄉樹
扶桑外主人孤島中別離方異域音信若為通

送禰郎中

東郊春草色驅馬去悠悠況復鄉山外猿啼湘水流島
夷傳露版江館候鳴騶卉服為諸吏珠官拜本州孤鶯

吟遠野野杏發山郵早晚方歸奏南中纔忌秋

送李太守赴上洛

商山包楚鄧積翠藹沈沈驛路飛泉灑開門落照深
野花開古戍行客響空林板屋春多雨山城晝欲陰
丹泉通號略白羽抵荆岑若見西山爽應知黃綺心

青龍寺曇壁上人兄院集

高處敞招提虛空詎有倪坐看南陌騎下聽秦城雞
眇眇孤煙起芊芊遠樹齊青山萬井外落日五陵西
眼界

今無染心空安可迷

韋侍郎山居

幸忝君子顧遂陪塵外蹤
閒花滿巖谷瀑水映杉松
啼鳥忽臨澗歸雲時抱峰
良遊盛簪紱繼跡多夔龍
詎枉青門道胡聞長樂鐘
清晨去朝謁車馬何從容

春過賀遂員外藥園

前年槿籬故新作藥欄成
香草為君子名花是長卿
水穿盤石透藤繫古松生
畫畏開厨走來蒙倒屣迎
蔗漿

菰米飯藟醬露葵羹頗識灌園意於陵不自輕

過盧四員外宅看飯僧共題七韻

三賢異七賢青眼慕青蓮乞飯從香積裁衣學水田
上人飛錫杖檀越施金錢趺坐檐前日焚香竹下煙寒空
法雲地秋色淨居天身逐因緣法心過次第禪不須愁
日暮自有一燈然

河南嚴尹弟見宿敝廬訪別人賦十韻

上客能論道吾生學養蒙貧交世情外才子古人中冠

上方簪笏車邊已畫熊拂衣迎五馬垂手憑雙童花醪
和松屑茶香透竹叢薄霜澄夜月殘雪帶春風古壁蒼
苔黑寒山遠燒紅眼看東侯別心事北川同為學輕先
輩何能訪老翁欲知今日後不樂為車公

投道一師蘭若宿

一公猶太白高頂出風煙梵流諸壑徧花雨一峯徧迹
為無心隱名因立教傳鳥來還語法客去更安禪晝涉
松路盡暮投蘭若邊洞房隱深竹清夜聞遙泉向是雲

霞裏今成枕席前
豈惟暫留宿服事將窮年

遊化感寺

翡翠香煙合瑠璃寶地平
龍宮連棟宇虎穴傍檐楹
谷靜惟松響山深無鳥聲
瓊峯當戶折金澗透林鳴
郢路雲端迴秦川雨外晴
雁王銜果獻鹿女踏花行
抖擻辭貧里歸依宿化城
繞籬生野蕨空館發山櫻
香飯青菰米嘉蔬綠笋莖
誓陪清梵末端坐學無生

遊悟真寺

聞道黃金地仍開白玉田
擲山移巨石呪嶺出飛泉
猛虎同三逕愁猿學四禪
買香然綠桂乞火踏紅蓮
草色搖霞上松聲汎月邊
山河窮百二世界接三千
梵宇聊憑視王城遂渺然
灞陵纔出樹渭水欲連天
遠縣分諸郭孤村起白煙
望雲思聖主披霧隱羣賢
薄宦慚尸素終身擬尚玄
誰知草菴客曾和栢梁篇

曉行巴峽

際曉投巴峽餘春憶帝京
晴江一女浣朝日衆雞鳴
水

國舟中市山橋樹杪行登高萬井出眺迴二流明人作
殊方語鶯為故國聲賴多山水趣稍解別離情

東谿玩月

月從斷山口遙吐柴門端萬木分空霽流陰中夜攢光
連虛象白氣與風露寒谷靜秋泉響巖深青靄殘清澄
入幽夢破影抱空巒恍惚琴窗裏松谿曉思難

田家

舊穀行將盡良苗未可希老年方愛粥辛歲且無衣雀

乳青苔井雞鳴白板扉柴車駕羸犢草屨牧豪猊夕雨
紅榴坼新秋綠芋肥餉田桑下憩旁舍草中歸佳處名
愚谷何煩問是非

沈十四拾遺新竹生讀經處同諸公作

閒居日清靜脩竹自檀欒嫩節留餘籜新叢出舊攔細
枝風響亂疎影月光寒樂府裁龍笛漁家伐釣竿如何
道門裏青翠拂仙壇

雜詩

朝因折楊柳相見洛陽隅
楚國無如妾秦家自有夫
對人傳玉腕映燭解羅襦
人見東方騎皆言夫婿殊
持謝金吾子煩君提玉壺

哭褚司馬

妄識皆心累浮生定死媒
惟言老龍吉未免伯牛災
故有求仙藥仍餘遯俗杯
山川秋樹苦窗戶夜泉哀
尚憶青驪去寧知白馬來
漢臣修史記莫蔽褚生才

過沈居士山居哭之

揚朱來此哭桑扈返于真獨自成千古依然舊四隣閒
簷喧鳥雀故榻滿埃塵曙月孤鶯囀空山五柳春野花
愁對客泉水咽迎人善卷明時隱黔婁在日貧逝川嗟
爾命丘井歎吾身前後徒言隔相悲詎幾晨

息夫人

莫以今時寵能忘舊日恩看花滿眼淚不共楚王言

班婕妤

玉窗螢影度金殿人聲絕秋夜守羅帷孤燈耿不滅

輞川集二十首

并序

今選十六首

余別業在輞川山谷其遊止有孟城坳華子岡文杏館
斤竹嶺鹿柴木蘭柴茱萸泝宮槐陌臨湖亭南垞
歌湖柳浪齧家瀨金屑泉白石灘北垞竹里館辛夷
塢漆園椒園等與裴迪閒暇各賦絕句云爾

孟城坳

新家孟城口古木餘衰柳來者復為誰空悲昔人有

華子岡

飛鳥去不窮連山復秋色上下華子岡惆悵情何極

斤竹嶺

檀欒映空曲青翠漾連漪暗入商山路樵人不可知

鹿柴

空山不見人但聞人語響返景入深林復照青苔上

木蘭柴

秋山斂餘照飛鳥逐前侶彩翠時分明夕嵐無處所

宮槐陌

仄逕蔭宮槐幽陰多綠苔
磨門但迎掃畏有山僧來

臨湖亭

輕舸迎上客悠悠湖上來
當軒對樽酒四面芙蓉開

南垞

輕舟南垞去北垞淼難即
隔浦望人家遙遙不相識

歌湖

吹簫凌極浦日暮送夫君
湖上一迴首青山卷白雲

柳浪

分行接綺樹倒影入清漪不學御溝上春風傷別離

樂家瀨

颯颯秋雨中淺淺石榴瀉跳波自相濺白鷺驚復下

白石灘

清淺白石灘綠蒲向堪把家住水東西浣紗明月下

北垞

北垞湖水北雜樹映朱欄逶迤南川水明滅青林端

竹里館

獨坐幽篁裏彈琴復長嘯深林人不知明月來相照

辛夷塢

木末芙蓉花山中發紅萼澗戶寂無人紛紛開且落

漆園

古人非傲吏自闕經世務偶寄一微官婆娑數株樹

皇甫嶽雲谿雜題五首

人間桂花落夜靜春山空月出驚山鳥時鳴春澗中

右鳥鳴澗

日日采蓮去洲長多暮歸弄篙莫濺水畏濕紅蓮衣

右蓮花塢

乍向紅蓮沒復出青蒲颺獨立何襜褕銜魚古查上

右鷓鴣堰

朝耕上平田暮耕上平田借問問津者寧知沮溺賢

右上平田

春池深且廣會待輕舟迴靡靡綠萍合垂楊掃復開

右萍池

答裴迪輞口遇雨憶終南山之作

淼淼寒流廣蒼蒼秋雨晦君問終南山心知白雲外

山中寄諸弟妹

山中多法侶禪誦自為羣城郭遙相望惟應見白雲

聞裴秀才迪吟詩因戲贈

猿吟一何苦愁朝復悲夕莫作巫峽聲腸斷秋江客

贈韋穆十八

與君青眼客共有白雲心不向東山去日令春草深

送別

山中相送罷日暮掩柴扉
春草明年綠王孫歸不歸

別輞川別業

依遲動車馬惆悵出松蘿
忍別青山去其如綠水何

崔九弟欲往南山馬上口號與別

城隅一分手幾日還相見
山中有桂花莫待花如霰

菩提寺禁口號又示裴迪

安得捨羅網拂衣辭世喧
悠然策藜杖歸向桃花源

雜詩

家住孟津河門對孟津口常有江南船寄書家中否
君自故鄉來應知故鄉事來日綺窗前寒梅著花未
已見寒梅發復聞啼鳥聲心心視春草畏向階前生

崔興宗寫真詠

畫君年少時如今君已老今時新識人知君舊時好

書事

輕陰閣小雨深院晝慵開坐看蒼苔色欲上人衣來

闕題二首

荆谿白石出天寒紅葉稀山路元無雨空翠濕人衣
相看不忍發慘淡暮潮平語罷更攜手月明洲渚生

田園樂四首

萋萋春草秋綠落落長松夏寒牛羊自歸村巷童穉不
識衣冠

山下孤煙遠村天邊獨樹高原一瓢顏回陋巷五柳先
生對門

桃紅復含宿雨柳綠更帶朝煙花落家僮未掃鶯啼山
客猶眠

酌酒會臨泉水抱琴好倚長松南園露葵朝折東谷黃
梁夜春

少年行

新豐美酒斗十千咸陽遊俠多少年相逢意氣為君飲
繫馬高樓垂柳邊

九月九日憶山東兄弟

獨在異鄉為異客，每聞佳節倍思親。
遙知兄弟登高處，遍插茱萸少一人。

送元二使安西

渭城朝雨裊輕塵，客舍青青柳色新。
勸君更盡一杯酒，西出陽關無故人。

齊州送祖二

送君南浦淚如絲，君向東州使我悲。
為報故人顚顚盡，如今不似洛陽時。

送韋評事

欲逐將軍取右賢
沙場走馬向居延
遙知漢使蕭關外
愁見孤城落日邊

與盧員外象過崔處士興宗林亭

綠樹重陰蓋四隣
青苔日厚自無塵
科頭箕踞長松下
白眼看他世上人

寒食汜上作

廣武城邊逢暮春
汶陽歸客淚沾巾
落花寂寂啼山鳥

楊柳青青渡水人

戲題盤石

可憐盤石臨泉水復有垂楊拂酒杯
若道春風不解意何因吹送落花來

菩提寺禁裴迪來相看說逆賊等凝碧池上作
音樂供奉人等舉聲便一時淚下私成口號
誦示裴迪

萬戶傷心生野煙百官何日更朝天
秋槐葉落空宮裏


凝碧池頭奏管絃

涼州賽神

涼州城外少人行
百尺峰頭望
虜塵健兒擊鼓吹羌笛
共賽城東越騎神

歎白髮

宿昔朱顏成暮齒
須臾白髮變垂髻
一生幾許傷心事
不向空門何處銷



石倉歷代詩選卷三十五